



**Sumáriu Kazu**  
**Tribunál Judisiál Primeira Instáncia Suai**  
**Dezembu 2023**

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

**JSMP** kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Judisiál Primeira Instáncia Suai**  
**1. Totál kazu ne'ebé JSMP monitoriza :10**

Artigu	Tipu Kazu	Númeru
Artigu 145 Kódigu Penál (KP), no artigu 2, 3, 35 no 36 Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstikian hanesan krime publiku)	<b>5</b>
Artigu 177 KP	Abuzu seksuál ba menór	<b>1</b>
Artigu 172 no 173 KP no artigu 2, 3, 35 Lei Kontra Violénsia Doméstika (LKVD)	Violasaun seksuál no agravasaun ho natureza violénsia doméstika	<b>1</b>
Artigu 145 KP	Ofensa ba integridade fízika simples	<b>1</b>
Artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS	Ezersísiu podér paternál	<b>2</b>
<b>Totál</b>		<b>10</b>

**2. Totál desizaun ne'ebé JSMP monitoriza:9**

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275

Telefone: 3323883 | 77295795

[www.jsmp.tl](http://www.jsmp.tl)

[info@jsmp.minihub.org](mailto:info@jsmp.minihub.org)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

Tipu pena	Artigu	Númeru
Suspensaun ba prizaun nia ezekusaun	Artigu 68 KP	2
Pena prizaun no Indemnizasaun sivíl	Artigu 66 KP	2
Pena multa	Artigu 67 KP	1
Pena admoestasaun	Artigu 82 KP	1
Omologa pedidu dezisténsia keixa	Artigu 226 KPP	3
<b>Totál</b>		<b>9</b>

**Totál kazu sira ne'ebé adia tuir JSMP nia monitorizasaun:0**

**2. Totál kazu sira ne'ebé kontinua prosesu tuir JSMP nia monitorizasaun: 1**

## **B. Deskrisaun sumáriu kazu ba desizaun sira**

### **1. Krime abuzu seksuál ba menór**

Nú.Prosesu : 0014/18.MFSIC  
 KompozisaunTribunál : Koletivu  
 Juis : Dr Samuel da Costa Pacheco, Dr. Naason M.A.M. Doutel  
 no Dr. Hugo da Cruz Pui  
 Prokuradór : Dr. Rafael Jeronimo Gusmão  
 Defeza : Dr. Ezequeil Jeronimo Amaral (advogadu Privadu)  
 Desizaun : Pena prizaun tinan 10 no indemnizasaun sivíl US\$500.00

Iha 05 Dezembru 2023, Tribunál Judisiál Primeira Instánsia Suai prezide leitura akordaun ba krime abuzu seksuál ba menór ne'ebé envolve arguidu AC hasoru lezada ho idade tinan (13), iha Munisípiu Manufahi.

### **Akuzasaun prokuradór**

Prokuradór akuza katak iha 23 Setembru 2018, iha oras tuku 14:00 meiodia, lezada ho nia alin sira halimar iha señora AdA nia uma, lakleur arguidu lao liuhusi uma kotuk hodi bolu lezada dehan “ó mai lai”, maibé lezada lakohi entaun arguidu hakbesik ba lezada no haruka nia alin nain rua fila tiha ba sira nia uma. Tuir mai arguidu rasta lezada nia liman loos tama ba iha haris fatin hafoin buti metin lezada niaibun no arguidu hasai tudik hodi ameasa lezada no dehan ba leszaa katak “ó hakilar hau sei sona mate ó”, tuir mai lezada nonook arguidu kolu lezada nia roupa too iha ain tuur no latan lezada ba simente leten no lamas lezada nia orgaun sensitivu no arguidu hasai nia roupa hodi halo relasaun seksuál ho lezada. Hafoin halo hotu relasaun seksuál arguidu hatais nia roupa no lori lezada nia roupa hamos raan iha lezada nia orgaun sensitivu.

Tuir mai iha 24 Setembru 2018, iha oras tuku 14:00 meiodia, lezada fila husi eskola too iha uma maibé odamatan taka metin nune'e lezada tama ba haris fatin atu troka nia roupa no arguidu aproveita tama tuir lezada ba haris fatin ne'ebé odamatan savi ladi'ak

arguidu taka odamatan no ameasa lezada katak “*ó hakilar agora hau buti mate ó*” lezada tauk no nonok de’it arguidu komesa hasai lezada nia roupa hatoba lezada ba iha rai no arguidu toba iha lezada nia leten hodi halo relasaun seksuál ho lezada, hafoin halo hotu relasaun seksuál ho lezada arguidu haruka lezada hatais fali lezada nia roupa no depois sira fahe malu.

Iha 30 Setembru 2018, iha oras tuku 09:30 dadeer, lezada dasa hela foer iha uma kos laran hafoin lori ai-sar ba dasa rai iha uma kotuk, derepente arguidu mosu mai halo lezada hakfodak, arguidu ameasa hodi dehan “*ó labele hakilár, ó hakilar hau buti mate tiha ó*”, hafoin arguidu kaer lezada nia liman karuk rasta tama ba haris fatin hodi sadere ba parede hodi halo relasaun seksuál ho lezada, halo tiha relasaun seksuál arguidu hateten katak “*ó labele dehan ba ó nia inan aman no ó nia família sira, sela’e hau hetan ó iha dalan hau sona mate ó*”. Arguidu halo relasaun seksuál ho lezada dala tolu tutuir malu no iha 04 Outubru 2018, lezada ho nia inan ba apresenta keixa iha polisia no kontinua lori lezada ba halo ezaminasaun iha Pradet.

Prokuradór akuza arguidu kontra artigu 177 nú1 KP kona-ba abuzu seksuál ba menór ho moldura penál tinan 5 too 20.

### **Produsaun ba prova sira**

Iha prosesu julgamentu arguidu deklarara katak faktu iha akuzasaun ne’e balun loos no balun la loos, arguidu deklarara katak iha 23 Setembru 2018 no 30 Setembru 2018, la loos, loos mak iha 24 Setembru 2018, katak momentu ne’eba lezada ho mane seluk halo relasaun seksuál iha haris fatin no lezada sai mai arguidu husu lezada hatete Sr. MS ne’e fó osan hira ba o maibé lezada dehan fó de’it 0.50 sentavus, nune’e arguidu husu fali lezada dehan fó US\$5.00 ita rua halo fali relasaun seksuál no lezada mós hakarak no halo duni relasaun seksuál.

Alénde ne’e, lezada kontinua konfirma faktu sira hotu iha akuzasaun no deklarara katak iha akontesimentu ne’e tauk no la fó hatene ba ninia inan aman, tanba arguidu ameasa lezada katak bainhira fó hatene ba inan aman katak arguidu sei oho mate lezada, lezada mós deklarara katak nunka halo relasaun seksuál ho mane seluk no arguidu la fó osan.

Testemuña MdCS nu’udar lezada nia inan, depoimenta katak iha 31 Setembru 2018, kalan, arguidu ba iha uma kotuk hafuhu no testemuña atu ba haris fatin mak leno kona arguidu hakilar dehan naok ten, maibé arguidu mai husu deskulpa ba testemuña no fila ba ninia uma, testemuña deklarara tan katak iha dadeer derepente arguidu nia feen mai hirus fali testemuña katak “*ó nusa horikalan hakilar hau nia la’en naok ten*”, maibé testemuña hateten katak kalan boot mai uma maibé nonook iha uma ne’e mak hau hakilar dehan naok ten, hafoin testemuña hatan nune’e sira diskute malu no arguidu nia feen hateten sai ba testemuña katak “*ó nia oan ne’e la virgen ona*”, hau iha evidensia, testemuña la satisfas ho arguidu nia feen nia liafuan ne’e no apresenta keixa iha Polisia no lori lezada ba halo ezaminasaun iha PRADET.

Testemuña MS nu'udar lezada nia primu, depoimenta katak momentu akontesimentu ne'e la iha kuñesimentu ba kazu ne'e maibé arguidu dun fali testemuña katak halo fali relasaun seksuál ho lezada nune'e lezada nia inan ba husu kona-ba saida mak arguidu hatete maibé testemuña momentu ne'eba serbisu iha benkel no lezada mós iha ne'eba husu hotu maibé lezada hateten katak nunka halo relasaun seksuál ho testemuña.

Testemuña AGM nu'udar arguidu nia kaben, depoimenta katak iha momentu ne'ebá testemuña nia kaben ne'e sai husi uma atu lori ai-moruk ba arguidu nia inan moras, sai husi uma tuku 18:30 to'o iha ne'ebá tuku 20:30 kalan, testemuña mós kontaktu tuir arguidu katak to'o ona, maibé testemuña mós la hatene katak arguidu problema ho lezada.

Testemuña LdC nu'udar arguidu nia feton, depoimenta katak iha altura ne'ebá sira hatene katak sira nia inan moras duni no bainhira arguidu sai husi uma ne'e lokraik tuku 18:30 to'o iha sira nia uma iha oras tuku 20:30 kalan.

### **Alegasaun finál**

Prokuradór haktuir katak, mezmu iha julgamentu arguidu nega faktu balu iha akuzasaun, maibé iha parte seluk lezada kontinua konfirma faktu sira hotu iha akuzasaun no reforsa mós ho relatóriu médiku husi Pradet no testemuña sira nia depoimentu. Nune'e prokuradór konklui katak arguidu nia aktu ne'e priense duni elementu husi krime abuzu seksuál ba menór, tanba ne'e husu ba tribunál atu kondena arguidu ho pena prizaun tinan rua nolu.

Entretantu defeza haktuir katak, iha perante julgamentu arguidu konfesa parsial no deklarata katak arguidu halo duni relasaun seksuál maibé dala ida de'it no arguidu mós la uza tudik ruma hodi ameasa ka obriga lezada no iha momentu ne'ebá mós arguidu ba hare'e inan moras, maibé rona fali husi lezada no testemuña sira konfirma faktu iha akuzasaun, nune'e husu ba tribunál atu aplika pena adekuadu ba arguidu.

### **Desizaun**

Depoisde avalia faktu sira hotu, tribunál prova katak arguidu komete duni krime abuzu seksuál ba menór hasoru lezada. Bazeia ba faktu provadu hirak ne'e no tetu mós ho sirkunstánsia hotu-hotu (agravante no atenuante )ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan sanulu no selu mós indemizasaun sivíl US\$ 500.00.

## **2. Krime ofensa ba integridade física simples**

Nú.Prosesu : 0005/20.ANMBS  
Kompozisaun tribunál : Singulár  
Juis : Dr. Hugo da Cruz Pui  
Prokuradór : Dr. Rafael Jeronimo Gusmão  
Defeza : Dr. Angelmo Pinto  
Desizaun : Omologa pedidu dezisténsia keixa

Iha 13 Dezembru 2023, Tribunál Judisiál Primeira Instánsia Suai prezide julgamentu

tentativa konsiliaun ba krime ofensa ba integridade fízika simples ne'ebé envolve arguidu Paul Martins hasoru lezadu Nuno Bendito Mendoça, iha Munisípiu Ainaro.

### **Akuzasaun Prokuradór**

Prokuradór akuza katak iha 05 Abril 2020, iha oras tuku 14:00 meiodia, lezadu ho nia primu Amandio sai husi uma atu ba kuu sabraka iha subriñu Agustino nia uma, iha Aldeia Maulai, Suku Maneto-Maubisse, Munisípiu Ainaro. Bainhira lezadu ho nia primu Amandio la'ó tóo iha dalan klaran diresaun ba subriñu Agustino nia uma, konsege hare'e arguidu nia kaben ho labarik oan ida tuur hela iha dalan, ho nune'e lezadu konversa halimar ho labarik oan ne'e hafoin sira kontinua lao liu ba kuu sabraka. Depoizde lezadu ho nia primu kuu tiha sabraka, sira nain rua deside fila ba señor Julio nia uma hodi tuur hemu hela kafe, lakleur arguidu mosu mai hodi husu dehan "*ó nia ferik oan mak iha uma, ó ba saruntu ne'e ka*", no diretamente arguidu tuku ho tebe dala barak iha lezadu nia knosen parte karuk no kalilin parte karuk halo lezadu monu tun ba rai.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa.

### **Produsaun ba prova sira**

Bazeia ba artigu 262 (1) Kódigu Prosesu Penál) kona-ba tentativa konsiliaun, nunée antes tama ba julgamentu produsaun ba prova juis husu atu halo tentativa konsiliaun ba arguidu no lezadu.

Iha prosesu tentativa konsiliaun ne'e, parte sira hakarak dame malu sein kondisaun ruma tanba antes ne'e sira dame malu ona.

### **Alegasaun finál**

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

### **Desizaun**

Bazeia ba akordu dame no pedidu dezisténsia keixa husi parte sira, tribunál konklui prosesu ne'e no omologa akordu dame ne'e.

### **3. Krime ofensa ba integridade fízika simples ho natureza violénsia doméstika**

Nú.Prosesu	: 0004/23.CVMCT
KompozisaunTribunál	: Singulár
Juis	: Dr. Hugo da Cruz Pui
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Pena prizaun fulan 6 suspende ba tinan 1

Iha 13 Dezembru 2023, Tribunál Judisiál Primeira Instánsia Suai prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AJCM hasoru nia feen, iha Munisípiu Covalima.

### **Akuzasaun prokurador**

Prokuradór akuzá katak iha 27 Feveireiru 2023, iha oras tuku 19:30 kalan, arguidu tebe dala ida iha lezada nia kotuk laran rezulta lezada monu ba rai, lezada hader fali arguidu kontinua tuku tan dala ida iha lezada nia ulun, buti lezada nia kakorok hodi baku ba iha parede lezada monu ba rai arguidu sama no tuku tan dala ida iha lezada nia hasan parte loos rezulta raan sai husi ibun no inus. Antes agresaun ne'e, arguidu ko'alia hela ho fetu seluk nune'e lezada hase arguidu sira diskute malu no mosu agresaun ne'e.

Prokuradór akuzá arguidu kontra artigu 145 KP kona-ba ofensa ba integridade física simples ho moldura penál too tinan 3 ka multa konjuga ho artigu 2, 3 (a), 35 no 36 LKVD.

### **Produsaun ba prova sira**

Iha prosesu julgamentu, arguidu konfesa faktu sira hotu iha akuzasaun no deklará katak baku feen ne'e ladi'ak no arrepende nia hahalok no promete sei la repete hahalok ne'e hasoru lezada, foin mai hatan iha tribunál no arrepende ona nia hahalok.

Alende ne'e, lezada kontinua konfirma faktu hotu iha akuzasaun no deklará katak liu tiha loron haat sira di'ak malu kedas, depoisde akontesimentu arguidu husu deskulpa no to'o ohin loron arguidu labaku ona lezada.

### **Alegasaun finál**

Prokuradór haktuir katak arguidu provadu komete krime hasoru lezada no lezada mós konfirma katak arguidu halo duni asaun hasoru lezada, haree ba krime violénsia doméstika aas tebes, nune'e husu ba tribunál atu kondena arguidu ho pena prizaun.

Enkuantu defeza haktuir katak depoisde akontesimentu arguidu ho lezada di'ak malu ona no defeza haree katak futuru sei la akontese krime hasoru lezada, tanba ne'e husu ba tribunál atu kondena arguidu ho pena multa.

### **Desizaun**

Depoisde avalia faktu sira hotu, tribunál konsidera faktu hotu provadu, bazeia ba faktu provadu sira ne'e no tetu mós ho sirkunstánsia (agravavante no atenuante) sira ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

## **4. Krime violasaun seksuál no agravaun ho natureza violénsia doméstika**

Nú.Prosesu : 0005/23.ANANV

KompozisaunTribunál : Koletivu

Juis : Dr Samuel Costa Pacheco, Dr. Naason M.A.M. Doutel no  
Dr. Hugo da Cruz Pui.

Prokuradór : Dr. Pascasio de Roza Alves

Defeza : Dr. Jonas Henrique da Costa  
Desizaun : Pena prizaun tinan 10 no indemnizasaun sivil US\$500.00

Iha 14 Dezembru 2023, Tribunál Judisiál Primeira Instánsia Suai prezide leitura akordaun ba krime violasaun seksuál ho agravasaun natureza violénsia doméstika ne'ebé envolve arguidu NdC hasoru oan entiada, iha Munisípiu Ainaro.

### **Akuzasaun prokuradór**

Prokuradór akuza katak iha 05 Feveireiru 2023, iha oras tuku 15:00 lokraik, arguidu aproveita lezada ho nia kondisaun inkapaz (moras mental) arguidu bolu lezada atu tama ba arguidu nia kuartu laran. Rona tiha xamada ne'e lezada mós tama kedas ba kuartu laran, arguidu hatoba lezada iha kama leten no halo relasaun seksuál ho lezada no lezada laiha forsa atu deziste arguidu nia aktu ne'e, tanba lezada moras mental ka inkapaz. Depoisde halo tiha relasaun seksuál ho lezada arguidu ameasa lezada atu labele konta ba ema seluk, bainhira konta ba ema seluk arguidu sei oho mate lezada, maibé lezada la tauk arguidu nia ameasa ne'e no konta arguidu ninia hahalok ne'e ba lezada nia alin feto.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 too tinan 20 no artigu 173 alinea c, KP kona-ba agravasaun no artigu 2, 3 (c), artigu 35 (b), LKVD.

### **Produsaun ba prova sira**

Iha prosesu julgamentu arguidu deklarata katak faktu sira iha akuzasaun ne'e laloos hotu no arguidu deklarata katak iha altura ne'ebá lezada fase hela bikan iha dapur laran no arguidu aruma hela rupa iha kuartu laran atu ba serbisu hanesan badaen iha Ainaro, arguidu mós deklarata tan katak nunka bolu lezada atu tama ba iha kuartu laran nune'e mós arguidu hateten katak nunka atu ameasa lezada ho katana ruma ka atu oho lezada, arguidu dehan nia la halo relasaun seksuál ho lezada, maibé lezada ho nia alin feto mak bosok, antes nemós lezada ba halimar bingo iha viziñu sira, mai hakilár lezada atu sai ba hare'e nia oan no lezada nia alin ne'e mak deskonfia de'it. Arguidu mós hatene lezada moras mentál no durante ne'e arguidu buka ai-moruk hodi kura lezada nia moras ne'e.

Alende ne'e lezada kontinua konfirma faktu sira iha akuzasaun no deklarata katak depoisde halo hotu tiha relasaun seksuál arguidu ameasa lezada atu labele konta sai problema ne'e ba ema seluk, maibé lezada la tauk no hateten sai problema ne'e ba lezada nia alin no kontinua ba fó hatene ba nia inan no apresenta keixa iha polísia.

Testemuña AL nu'udar lezada nia alin feto rasik, depoimenta katak arguidu hanesan aman haki'ak, testemuña haktuir katak momentu ne'eba ba halimar bingo viziñu sira nia uma no fila mai bolu lezada atu halimar ho lezada nia oan no lezada sai husi kuartu

laran ho tanis no dehan katak arguidu obriga lezada halo relasaun seksuál. Testemuña rona ida ne'e lori kedas lezada ba apresenta keixa iha Polísia.

### **Alegasaun finál**

Prokuradór haktuir katak, mezmú iha julgamentu arguidu nega faktu hotu iha akuzasaun, maibé iha parte seluk lezada kontinua konfirma faktu hotu iha akuzasaun no reforsa mós husi testemuña no relatóriu médiku husi PRADET. Nune'e prokuradór konklui katak arguidu nia aktu ne'e priense duni elementu husi krime violásaun seksuál no agravasaun, tanba ne'e husu ba tribunál atu kondena arguidu ho pena prizaun tinan sanolu.

Entretantu defeza haktuir katak, arguidu deklara katak nia la halo relasaun seksuál ho lezada no nunca atu ameasa lezada, arguidu hateten katak iha momentu ne'ebá arguidu aruma nia rounpa atu ba serbisu, mezmú nune'e lezada konfirma katak arguidu halo duni relasaun seksuál ho lezada no ameasa lezada, no rona mós husi testemuña katak nia la hare'e ho matan maibé lezada mak konta ba testemuña nune'e ba hato'o keixa iha polísia, nune'e defeza husu ba tribunál atu deside tuir konviksaun tribunál nian.

### **Desizaun**

Depoisde avalia faktu hotu, tribunál prova katak arguidu komete duni krime violasaun seksuál hasoru lezada, mezmú iha julgamentu arguidu koko nega faktu hotu iha kauzasaun, maibé lezada konfirma faktu sira hotu iha akuzasaun no reforsa husi testemuña nomós rezultadu ezamizasaun ne'ebé junta iha prosesu.

Bazeia ba faktu provadu sira ne'e no tetu mós sirkunstansia hotu-hotu n'ebé haleu krime ne'e sirkunstánsia (agravante no atenuante sira), nune'e tribunál konklui prosesu ne'e no kondena arguidu ho pena prizaun tinan sanolu no selu mós indemnizasaun sivíl US\$500.00.

## **5. Kazu sivíl regulasaun ba ezersísiu podér paternál**

Nú.Procesu	: 0032/22.CVTDS
Kompozisaun Tribunál	: Singulár
Juis	: Dr. Ivan José Suritay Patrocino Antonino
Prokuradór	: Dr. Pascacio de Rosa Alves
Defeza	: Dr. Angelmo Pinto
Desizau	: Omologa pedidu dezisténsia keixa

Iha 14 Dezembru 2023, Tribunál Judisiál Primeira Instánsia Suai prezide julgamentu tentativa konsiliaun ba kazu regulasaun ezersísiu podér paternál ne'ebé envolve autór BCAS hasoru rekeridu FJCCA no rekerida GNGdS nu'udar autór nia inan-aman, iha Munisípiu Ainaro.



### **Termu no fundamentu sira**

Iha 2018, rekerida ho rekeridu moris hamutuk hanesan feen la'en no rekerida isin rua ba sira nia oan, maibé rekeridu nonook sai husi uma no ba kontinua eskola iha Indonézia no la tau matan ba menór ninia nesesidade baziku lor-loron nian. Prokuradór representa menór hatama asaun ida ne'e atu rekeridu aman tau matan ba menór ninia nesesidade loro-loron nian.

Kazu ne'e relasiona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

### **Tentativa konsiliaun**

Iha prosesu tentativa konsiliaun ne'e rekerida no rekeridu konkorda menór nafatin hela ho rekerida, rekeridu no rekrida mós konkorda rekeridu vijita menór iha loron Sabadu no Domingo, maibé antes atu vijita menór fó hatene uluk rekerida inan hafoin vijita menór, alende ne'e rekeridu no rekerida konkorda hamutuk atu rekeridu fó alimentasaun ba menór kada fulan US\$150.00 no osan refere fó komesa fulan Dezembru no sei manda liuhosi rekerida nia konta bankaria.

### **Alegasaun finál**

Prokuradór representa menór no defeza husu ba tribunál atu omologa akordu ne'ebé parte rua konkorda ona atu tau matan menór.

### **Desizaun**

Bazeia ba pedidu husi parte sira, tribunál konklui prosesu ne'e no omologa akordu ne'e..

### **6. Kazu sivíl regulasaun ba ezersísiu podér paternál**

Nú. Prosesu	: 0077/23.CVTDS
Kompozisaun Tribunál	: Singulár
Juis	: Dr. Ivan José Suritay Patrocínio Antonino
Prokuradór	: Dr. Pascasio de Rosa
Defeza	: Dr. Angelmo Pinto
Desizaun	: Omologa pedidu dezisténsia keixa

Iha 14 Dezembru 2023, Tribunál Judisiál Primeira Instánsia Suai prezide julgamentu tentativa konsiliaun ba kazu regulasaun ezersísiu podér paternál envolve autór FM hasoru rekeridu HM (aman) no rekerida AdO (inan), iha Munisípiu Ainaro.

### **Termu no fundamentu sira**

Iha fulan no loron ne'ebé la apura, maibé iha 2023, rekeridu sai husi uma tanba rekerida ho nia família sira mak la kohi rekeridu, tanba ne'e rekeridu abandona sira nia oan no la fó alimentasaun, nune'e prokuradór representa menór hatama asaun ida ne'e, hodi nune'e rekeridu atu tau matan ba menór ninia nesesidade loro-loron nian.

Kazu ne'e relasiona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS, kona-ba responsabilidade inan-aman ba menór.

### **Tentativa konsiliaun**

Iha julgamentu tentativa konsiliaun ne'e, rekeridu no rekerida konkorda menór nafatin hela ho rekerida no rekeridu sei ba vízita menór semana rua dala ida iha loron Sabadu no loron Domingu. Alende ne'e rekeridu konkorda kada fulan sei fó osan US\$20.00 ba sira nia oan.

### **Alegasaun finál**

Prokuradór representa menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

### **Desizaun**

Bazeia ba parte rua nia akordu kona-ba alimentasaun, hela fatin no rejime vizita nian, tribunál konklui prosesu ne'e no omologa akordu ne'e.

## **7. Krime ofensa ba integridade fízika simples ho natureza violénsia doméstika**

Nú.Prosesu	: 0021/23.CVSLL
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Rafael Jeronimo Gusmão
Defeza	: Dr. Angelmo Pinto
Desizaun	: Pena admoestasaun

Iha 20 Dezembru 2023, Tribunál Judisiál Primeira Instansia Suai prezide leitura sentensa ba krime ofensa ba integridade fízika simples ho natureza violénsia doméstika VD ne'ebé envolve arguidu PS hasoru nia feen, iha Munisípiu Covalima.

### **Akuzasaun Prokuradór**

Prokuradór akuza katak iha 09 Maiu 2023, iha oras tuku 19:00 kalan, arguidu fila husi toos ho kondisaun lanu, lezada hase arguidu no hateten katak "*ó sa mai lanu hela de'it ne'e*", rona tiha lezada nia liafuan ne'e arguidu dudu lezada monu tun ba rai rezulta lezada sofre moras.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa, konjuga ho artigu 2,3 (a) 35 (b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklara katak di'ak malu ona ho lezada no promete sei la kometa tan krime hanesan iha futuru.

Prokuradór husu ba tribunál atu presinde lezada ninia deklarasaun, tanba arguidu konfesa faktu hotu iha akuzasaun.

### **Alegasaun finál**

Prokurador haktuir katak, arguidu provadu komete krime hasoru lezada bazeia ba konfisaun arguidu nian, nune'e atu prevene krime ne'e akontese tan iha futuru husu ba tribunál atu kondena arguidu ho pena ne'ebé adekuadu.

Entretantu defeza husu ba tribunál atu kondena arguidu ho pena ne'ebé adekuadu ho konsiderasaun katak, arguidu konfesa, arrepende nia hahalok, di'ak malu ona ho lezada no promete sei la komete tan krime hanesan iha futuru hasoru lezada.

### **Desizaun**

Depoisde avalia faktu hotu, tribunál prova katak arguidu dudu lezada monu tun ba rai rezulta lezada sofre moras.

Bazeia ba faktu provadu sira ne'e no tetu mós ho sirkuntánsia atenuante sira hanesan arguidu konfesa, di'ak malu ona ho lezada no promete sei la komete tan krime hanesan iha futuru hasoru lezada, nune'e tribunál konklui prosesu ne'e no kondena arguidu ho pena admoestasaun.

### **8. Krime ofensa ba integridade fízika simples ho natureza violénsia doméstika**

Nú. Prosesu : 0002/23.CVFTK  
Kompozisaun Tribunál : Singulár  
Juis : Dr. Naasson Mario Armindo. M. D. Sarmiento  
Prokuradór : Dr. Pascacio de Rosa Alves  
Defeza : Dr. Albano Maia  
Desizaun : Pena prizaun fulan 3 suspende ba tinan 1

Iha 20 Dezembru 2023, Tribunál Judisiál Primeira Instánsia Suai prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdNA hasoru nia feen, iha Munisipiu Covalima.

### **Akuzasaun prokuradór**

Prokuradór akuza katak iha 03 Agostu 2023, iha oras tuku 19:00 kalan, lezada rona gravasaun husi voice iha arguidu nia telefone ne'ebé hatete arguidu husu ba nia kolega buka fetu seluk ba arguidu, lezada husu voice ne'e ba arguidu, nune'e arguidu tuku dala ida iha lezada nia tilun hun parte karuk, basa dala ida iha lezada niaibun rezulta raan, arguidu kontinua buti lezada nia kakorok no silu lezada nia liman fuan parte loos dala ida rezulta lezada sofre moras.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál too tinan 3 ka multa konjuga ho artigu 2, (a) 3 (a), 35 (b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu sira hotu iha akuzasaun no depoisode akontesimentu husu ona deskulpa ba lezada no promete iha futuro sei lakomete tan krime hasoru lezada no ema seluk.

Alende ne'e lezada kontinua konfirma faktu sira iha akuzasaun no reforsa arguidu nia deklarasaun katak depoisode akontesimentu to'o agora arguidu la baku ona lezada.

### **Alegasaun finál**

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, tanba ne'e husu ba tribunál atu kondena arguidu tuir konfiksaun tribunál nian.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, husu ona diskulpa ba lezada no promete iha futuro sei la komete tan krime hanesan hasoru lezada no ema seluk.

### **Desizaun**

Depoisode avalia faktu sira hotu, tribunál prova katak arguidu tuku dala ida iha lezada nia tilun hun parte karuk, basa dala ida iha lezada niaibun rezulta raan, arguidu kontinua buti lezada nia kakorok no silu lezada nia liman fuan parte loos dala ida rezulta lezada sofre moras.

Bazeia ba faktu provadu sira ne'e no tetu mós sirkunstánsia (atenuante no agravante) ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

## **9. Krime ofensa ba integridade fízika simples ho natureza violénsia doméstika**

Nú prosesu	: 0014/23.CVMCT
Kompozisaun Tribunál	: Singulár
Juis	: Dr. Naasson Mario Armindo M. D. Sarmiento
Prokuradór	: Dr. Pascacio de Rosa Alves
Defeza	: Dr. Albano Maia
Desizaun	: Pena multa US\$60.00

Iha 20 Dezembru 2023, Tribunál Judisiál Primeira Instánsia Suai prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu PA hasoru nia feen, iha Munisipiu Covalima.

### **Akuzasaun prokuradór**

Prokuradór akuza katak iha 03 Agostu 2022, iha oras tuku 19:00 kalan, arguidu tuku dala ida iha lezada nia kotuk laran. Antes ne'e arguidu fila husi toos haree lezada la prepara hahan kalan nian, nune'e arguidu halo agreasaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál too tinan 3 ka multa konjuga ho artigu 2, (a) 3 (a), 35 (b) no 36 LKVD.

### **Produsaun ba prova sira**

Iha julgamentu, arguidu hili direitu nonook. Enkuantu lezada kontinua konfirma faktu hotu iha akuzasaun no deklarata katak depoisde akontesimentu arguidu labaku ona lezada no lezada perdua ona arguidu ninia hahalok ne'e.

### **Alegasaun finál**

Prokuradór konsidera arguidu nia aktu ne'e provadu hotu, mezmu iha julgamentu arguidu hili nonook maibé lezada kontinua konfirma faktu hotu iha akuzasaun, prokuradór haree katak krime violénsia doméstika aas tebes, nune'e atu halo prevensaun ba krime refere husu ba tribunál atu kondena arguidu tuir artigu 145 KP.

Entretantu defeza haktuir katak iha perante julgamentu arguidu hili direitu nonook no lezada konfirma faktu hotu iha akuzasaun, nune'e husu ba tribunál atu kondena arguidu ho pena ne'ebé kmaan.

### **Desizaun**

Depoisde avalia faktu hotu, tribunál prova katak arguidu tuku dala ida iha lezada nia kotuk laran.

Bazeia ba faktu provadu hirak ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunálkonklui prosesu ne'e no kondena arguidu ho pena multa US\$ 60.00 ne'ebé arguidu sei selu US\$1.00 kada loraun durante loraun 60. Tribunál mós fiksa pena alternativa durante loraun 40 prizaun, bainhira arguidu la kumpri pena multa refere.

### **Atu hetan informasaun liutan favór kontaktu:**

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)

[info@jsmp.tl](mailto:info@jsmp.tl)

Website: <http://jsmp.tl>

